



HASATIL

(HAMETIN AGRICULTURA SUSTENTAVEL TIMOR LOROSA'E)

Rua. St. Antonio Motael – Farol, Dili

Tel. (+670) 77287429 E-mail: hasatil@sapo.tl

KOMUNIKADU BA IMPRENSA KONA-BA LORON MUNDIAL AI-HAN 16 OUTUBRU 2017

Iha eventu komemorasaun loran mundial ai-han 2017, Redi HASATIL nu'udar rede nasional ne'ebé servisu ba hametin agrikultura sustentavel iha Timor-Leste, hakarak hato'o ami nia observasaun no rekomendasaun balu relasiona dezvoltimentu setor agrikultura iha Timor-Leste.

Uluk nana'in, Rede HASATIL hakarak louva agrikultór sira hotu iha Timór laran tomak ne'ebé kontinua servisu maka'as hodi halo produsaun ai-han ba ema hotu maski hasoru dezafiu no problema oi-oín.

Loron importante ne'e mós, hanesan momentu di'ak atu bolu Governu, Parlamentu Nasionál, Prezidente Repúblika no ba Públiku tomak nia atensaun ba situasaun real iha Timor-Leste liga ba produsaun ai-han iha rai laran, no dependénsia ba importasaun ai-han husi rai li'ur.

Durante tinan 15 nia laran, governu Timor-Leste no ajénsia dezvoltimentu sira gasta ona osan tokon ba tokon hodi dezvoltimentu setor agrikultura no peska. Maibe infelizmente, dados estatística husi governu nian rasik hatudu katak seidak iha mudansa signifikante ne'ebé mak atinji ona. Produsaun agrikultura kontinua la estavel, ita nia merkadu sira nafatin domina husi ai-han importadu no malnutrisaun kontinua sai problema bo'ot (*haree dados*).

Dados

Iha tinan 2007 Timor-Leste nia produsaun hare hamutuk 60,424 toneladas, hafoin de sa'e tun husi 2008 to 2014, iha tinan 2015 produsaun foos total hamutuk 60,361 ton. Iha tinan 2016 no 2017, previzaun FAO nian hatudu katak produsaun sei tun uitoan tan. Dokumentu MAP nian kona ba Seguransa Ai-han no Nutrisional 2017 hatudu katak ita importa maizumenus 40% husi sereais (foos no batar) ne'ebé ita konsumu. Malnutrisaun nafatin ás ho percentajen 'stunting' 50.2%, wasting 11.0% no Underweight 37.7%. (Fontes: MAP & FAO)

Tuir Rede HASATIL nia observasaun, durante ne'e governu fó liu prioridade ba hasa'e produsaun foos no batar hodi introduz input li'ur (externál) oi-oín. Maibe fó atensaun menus liu ba produsaun produktu sira ne'ebé iha valor ekonómiku no nutrisaun ás liu ba comunidade sira, hanesan hortikultura, peska no pekuaria. Ida ne'e refléta iha investimentu maka'as ba iha irigasaun eskala bo'ot hodi fornese bee ba natar sira, maibé ladún iha investimentu atu estabesele sistema irigasaun ka sistema kolleita bee eskala ki'ik, iha nivel Aldeia no Suku sira, hodi fornese bee nato'on ba familia sira ne'ebé halo produsaun modo, hakiak ikan no hakiak animál iha nivel uma kain no comunidade.

Redi HASATIL hakarak fó hanoin fali katak, Planu Estratéjiku Dezvoltimentu Nasionál 2011-2030 envizona Timor-Leste atu sai nasaun ida ne'ebé '*iha ekonomia ne'ebé diversifikadu no modernu...*' '*iha auto suficiensia ai-han*' no '*agrikultura subsisténsia transforma ba agrikultura komersial proprietáriu ki'ik (smallholders)*'. Vizaun furak ida ne'e rekere planu dezvoltimentu Timor-Leste nian atu fó prioridade ba diversifikasaun ekonómiku, diversifikasaun ai-han, no atensaun ba agrikultura iha nivel familia no comunidade.

Ikus liu, HASATIL hanoin katak programa agrikultura sira ne'e, tenki fó benefísiu hanesan ba feto no mane agrikultór, no maximiza agrikultór feto sira nia partisipasaun no kontribuisaun ba produsaun agrikola. Investimentu barak fó benefísiu bo'ot liu ba mane sira, en termus de hakma'an agrikultór sira nia servisu.

Tuir mai HASATIL nia rekomendasaun espesífiku ba VII Governu Konstitusionál atu konsidera:

1. Prioritiza no hasa'e orsamentu estadu ba setór agrikultura no peska, liu-liu iha programa importante sira hanesan:
 - Kapasitasaun no formasaun ba agrikultór no peskadór sira atu hasa'e produsaun no jestaun tuir dalan ne'ebé sustentável;
 - Fasilita ekipamentu prosesamentu nian no kapasita grupu prosesamentu ai-han no produktu peska sira ne'ebé mak eziste ona atu hadi'ak liu tan sira nia kualidade produktu, asesu ba merkadu, no jestaun;
 - Kapasita agrikultór no peskadór sira atu bele hadi'ak sira nia moris liu husi diversifikasaun ekonómiku ka fonte de rendimentu.
2. Fó prioridade no hasa'e orsamentu ba promove hortikultura, haki'ak animál no hakiak ikan iha nivél uma kain atu bele prodús produktu ne'ebé saudável no iha nutrisaun di'ak ba famillia, nu'udár dalan ida atu hamenus malnutrisaun, no iha tempu hanesan azuda ekonomia famillia nian;
3. Konstrui irigasaun eskala-ki'ik iha nivél Aldeia no Suku hodi fornese bee ba atividade produsaun hortikultura no haki'ak animál iha nivél uma kain no comunidade. Presiza mós estabelese sistéma kolleita be'e iha área sira ne'ebé bee menus;
4. Promove diversifikasaun ai-han no konsiensilizasaun hodi muda kultura han, nu'udár dalan ida hodi hamenus importaun no mós hadi'ak kondisaun malnutrisaun iha Timor-Leste;
5. Governu tenki tau matan no halo avaliasaun krítiku ba projetu ajénsia internasionál sira nian atu labele hamosu problema iha tempu naruk ba Timor-Leste bainhira sira nia projetu remata;
6. Hametin igualdade entre mane no feto iha asesu ba facilidade, rekursu no oportunidade ba Kapasitasaun. No mós maximiza partisipasaun no kontribuisaun feto sira nian iha etapa produsaun tomak;
7. Promove agro-ekolójia, uza rekursu lokál atu hasa'e produsaun liu husi dalan ne'ebé la estraga meiu-ambiente.

To'o ba ne'e deit Redi HASATIL nia komunikadu imprensa ida ne'e. Rede HASATIL no membru sira prontu nafatin atu kontribui ba dezenvolvimentu ne'ebé promove agro-ekolójia no hametin soberania ai-han.

Viva Soberania Ai-han! Viva Agrikultór Timor-Leste! Viva Redi HASATIL!

Dili, 16 Outubru 2017

Gil Boavida, Coordenador Rede HASATIL

Grupu Trabalho Advokasia: Asosiasaun HAK, ETADep, Permatil, La'ó Hamutuk, Fundasaun Haburas, Kdadalak Sulimutu Institute, Raibea, Fokupers